

**Uunga siunnersuut: Illuliortiternernut aningaasalersuineq pillugu Inatsisartut inatsisaat
nr. xx, xx. xxx 2017-imeersoq**

(*Saqq.: Kommuninut, Nunaqarfinnut, Isorliunerusunut, Attaveqaqatigiinnermut
Ineqarnermullu Naalakkersuisoq*)

pillugu

Sanaartornermut ataatsimiititaliap

ISUMALIUTISSISSIONAA

Siunnersuutip aappassaaneerneqarneranut tunniunneqartoq

Suliarineqarnerani ataatsimiititaliaq ukuninnga inuttaqarpoq:

Inatsisartunut ilaasortaq Bendt B. Kristiansen, Inuit Ataqatigii, siulittaasoq

Inatsisartunut ilaasortaq Jens-Erik Kirkegaard, Siumut, siulittaasup tullia

Inatsisartunut ilaasortaq Pitsi Høegh, Siumut

Inatsisartunut ilaasortaq Jess Svane, Siumut

Inatsisartunut ilaasortaq Villy Olsvig, Inuit Ataqatigii

UKA 2017-ip nalaani ull. 5. oktober siullermeerereernermi siunnersuut ataatsimiititaliamit misissorneqarpoq.

1. Siunnersuutip imaa siunertaalu

Inatsisisatut siunnersuut Illuliortiternernut aningaasalersuineq pillugu inatsisaassaaq nutaaq ullumikkumullu naleqqussagaq. Sumi najugaqarneq apeqqutaalluni taarsigassarsiaritinneqartunut killissarititaasut assigiinngisitaarnerisigut siusinnerusukkut inatsiseqarnermut sanilliullugu sunmiiffiit mikinerusut iluaqtissinneqarput. Nutaamik aaqqissuussinertut piginnittut nikinneranni akilersuinissaq pilersinneqarpoq. Nuummi pigisat aalaakkaasut pillugit niuernermi pissutsit suli nalinginnaalersinniarneqarnerat tamatumani sulissutigineqarpoq. Kiisalu marloqiusamik taarsigassarsianik aqtsineq Naalakkersuisunit kommuninut nuunniarneqarpoq.

2. Siunnersuutip Inatsisartuni siullermeerneqarnera

Siunnersuut ataatsimut isigalugu tapersorsorneqarpoq, Inatsisisatulli siunnersuutip atuutilersinneqarnissaanut apeqqutit ataasiakkaat Sanaartornermut ataatsimiititaliamit misissoqquneqarput.

3. Tusarniaanermit akissutit

Tusarniaanermit akissutit inatsisisatut siunnersummut tapiliunneqarput, tamannalu Inatsisartut Siulittaasoqarfiannit ilusiliinissamut piumasaqaatinut naapertuuppoq.

Ataatsimiititaliap maluginiarpa, tusarniaanermit akissuteqarnissamut uku kaammattorneqarsimasut:

Naalakkersuisut Siulittaasuata Naalakkersuisoqarfia, Pinngortitamut Avatangiisinullu Naalakkersuisoqarfik, Aningaasaqarnermut Akileraartarnermullu Naalakkersuisoqarfik, Aatsitassanut Ikummatissanullu Naalakkersuisoqarfik, Aalisarnermut Piniarnermullu Naalakkersuisoqarfik Inuussutissarsiornermut, Suliffeqarnermut, Niuernermut, Nukissiuuteqarnermullu Naalakkersuisoqarfik, Isumaginninnermut, Ilaqutariinnermut, Naligiissitaanermut Inatsisinillu Atuutsitsinermut Naalakkersuisoqarfik, Peqqissutsimut Nunat Avannarliit Suleqatigiinnerannullu Naalakkersuisoqarfik, Ilinniartitaanermut, Kultureqarnermut, Ilisimatusarnermut, Ilageeqarnermullu Naalakkersuisoqarfik, Namminilivinnermut, Nunanut Allanut Nunalerinermullu Naalakkersuisoqarfik, A/S Inissiaatileqatigiiffik INI, Iserit A/S, Agerskov Consulting ApS, KANUKOKA, Qaasuitsup Kommunia, Qeqqata Kommunia, Kommuneqarfik Sermersooq, Kommune Kujalleq, KANUNUPE, SIK (Sulinermik Inuussutissarsiuteqartut Kattuffiat), Sulisitsisut (GE), Peqqinnissaq Pillugu Kattuffiat (PPK), Nunatsinni Perorsaasut Kattuffiat (NPK), Atorfillit Kattuffiat (AK), IMAK (Ilinniartitsisut Meeqqat Atuarfianeersut Kattuffiat), Kalaallit Nunaanni ilinniagartuut Kattuffiat (ASG), Mittarfeqarfiit A/S, Nukissiorfiit A/S, Asiaq, Kalaallit Nunaanni Rigsombudsmandi, Kalaallit Nunaanni Politimestereqarfik, Nunatta Eqqartuussivia, LM Ejendomme, Lynges.gl, Ejendomskontoret, DanskeBank, GrønlandBanken, BankNordik, BRFKredi,t Nykredit, Finanstilsynet.

Tamatuma saniatigut siunnersuut 11. maj 2017 tusarniaasarnermik portalimi tamanut saqqummiunneqarpoq uani: www.naalakkersuisut.gl, tusarniaanermullu killiliunneqarpoq ull. 13. juni 2017.

Soqtiginnittut amerlaqisut toqqaanartumik tusarniarneqarsimammata ataatsimiititaliap akuersaarnartippaa. Ataatsimiititaliali amigaatitut isigaa nunami kukkunersiuisut tusarniarneqarsimannngimmata, taamaattumillu nunami kukkunersiuinermik allaffeqarfiit ataatsimiititaliap nammineerluni attavigisimavai. Ataatsimiinnermit tassannga inerniliussat ataani allaaserineqarput.

4. Sassartitat

Kattuffit, ingerlatseqatigiiffiit aamma peqatigiiffiit uku ataatsimiititaliamit sassartinneqarsimapput: GrønlandsBanken A/S, Grønlands Revisionskontor A/S aamma Kommuneqarfik Sermersooq.

Grønlands Revisionskontor A/S-imit sassartitaq

Ull. 12. oktober kukkunersiuisoq naalagaaffimmit akuerisaq Knud Østergaard sassartinneqarpoq. Ataatsimiititaliap ataatsimiinnissaq piumasarinkuuua, inatsisiliornermummi atatillugu kukkunersiuinermik suliaqarfimmit ingerlatsisutut sinniisup ataatsip tusarniarniarneqarnissaa pingaaruteqarluinnartuusoq ataatsimiititaliamit isumaqarfingineqarmat.

Maannamut aaqqissuussineq malillugu Knud Østergaard inissiatillit peqatigiiffii sinnerlugit naatsorsuutinik amerlanernik atsiortartuuvoq.

Maluginiarneqarportaaq inatsisisstatut siunnersuut Piginneqatigiilluni inissiat pillugit inatsisisstatut siunnersuummut saqqummiunneqartumut ataqtigissinneqassasoq. Kukkunersiusarnermik allaffeqarfimmit nalilerneqarpoq, inatsisisstatut siunnersuutit taaku marlut inissianik niuernerup nalinginnaasup pituttorsimanngitsullu ineriarorneranut ajunngitsumik kinguneqarumaassasut.

GrønlandsBanken A/S-imit sassartitaq

Ull. 17. Oktober GrønlandsBanken A/S-imi pisortaanerup tullia John Jakobsen sassartinneqarpoq. Inatsisisstatut siunnersuut una aamma piginneqatigiilluni illulionermut inatsisisstatut siunnersuut (UKA 2017/104) ataatsimiinnermi isummersorfigineqarput.

Nunami inisianik niuernerit assigiinngitsorujussuusut aningaaserivimmit nalilerneqarpoq. Nuummi niuernerup nalinginnaangajattumik ingerlanneqalersimanera immikkut taaneqarpoq. Sisimiuni Ilulissanilu niuernerit amerliartuaarput, sumiiffinnili taakkunani tapiissuteqarfingineqartarnissaq suli pisariaqartinneqarpoq, Qaqortumili inissianik niuernerit suli nalorninartoqartinneqarput. Nunap sinnerani niuerneq ataatsimut isigalugu uninngasutut pissuseqarpoq.

Aningaaseriviup isumaa malillugu taamaalilluni inuiaqatigiinnit isumatusarnerussaaq tapiissuteqartarnermut aaqqissuussinerit Nuummi unitsinnejarpata, niuernerup namminerisamik ingerlanneqartarnera pissutigalugu. Akerlianilli peqatigitillugu nalilerneqarpoq, siunnersuutit saqqummiunneqartut marluusut sinerissami niuernermik

allanngortitsinaviangitsut, pigisanummi aalaakkaasunut neqeroorutigineqartartunut pissutsit piviusut tunngavigalugit pisisussaqanngimmat.

Aningaasap nalinga tunngavigalugu pilerinarsaarinnikut inissianik taarsigassarsinermi sioqqutsilluni akiligassat akilerneqarsinnaanerinut periarfissaq siunnersuutigineqartoq aningaaserivimmiaq ajunngitsutut isigineqarpoq.

Teknikimut atatillugu oqaatigineqarpoq, aserfallatsaaliuinerup amigaataanerani taarsigassarsiat akilerneqarnissaannut inatsisitigut piumasaqarnissaq pisariaqartariaqanngitsoq. Siunnersuummi siunertarineqartut aamma naapertorlugit pingaarnersiuilluni tulleriaarinissamut pitsaanerusumik ingerlatsinissaq taarsigassarsisisartut piumasaqartarerisigut isumannaarneqartareerpoq. [Tamannarpiaq aamma immaqa maaniinnerannut pissutaasinnaavoq. Ataatsimiititaliap isummersuutaa].

Procentilersuinerit appasinnerusut atuutilerpata aamma taarsigassarsiat akilerneqartareerpata aallaakaasumik pigisat akii malunnaatilimmik appariarnaviangitsut GrønlandsBankenimit nalilerneqarpoq.

Sinerissami pigisanut aalaakkaasunut taarsigassarsianut isumannaarneqarsimasunut atatillugu akiligassaaratarsinnaasut akilersinniarneqassappata niueruteqartarnissaq qularnarluinnassaq. Kisiannili aamma ajornartorsiutitaqarpoq taarsigassarsisisumit isummerfigineqartariaqartumik: pigisap aalaakkaasup tunineqarnissaata tungaanut qularnaveeqqut kimit nakkutigineqassava?

Kommuneqarfik Sermersuumit sassartitat

Ull. 20. September Kommuneqarfik Sermersuumit kommunaldirektør Lars Møller-Sørensen ilaluu sassartinneqarput.

Inatsisisstatut siunnersuutit saqqummiussat marluusut Kommuneqarfik Sermersuumit iluaquitissaqtassasut ajoquitissaqtassasullu kommunimit nalilerneqarpoq. Nuummi taarsigassarsiat 20/20/60-t atorunnaarsikkiantorneranni ajoqtaaratarsinnaasunut kommunimi inoqarfinni allani taarsigassarsinissamut nutaamik periarfissaqartuni iluaquitissiinerit taartaasinnaassasut ataatsimut isigalugu nalilerneqarpoq.

Nuummut immikkut tunngatillugu pisortanit tapiissutit annertuut pinngikkaluarlugit namminerisamik aamma illuliortoqartarnissaq nalilerneqarpoq. Nalilerneqarportaaq piginneqatigiilluni illuliat Nuummi pilerigineqaleqqissimasut, tamatumalu inatsisitigut iliuuserineqarsinnaasut nutaat atorlugit nanginnissaa naatsorsuutigineqartoq.

Nalilerneqarportaaq taarsigassarsisitsisartunut imminnut attuumasunut illuliassat taakkorpiaat assigiit pillugit tapiiffigineqarnissamik qinnuteqartoqarsinnaajunnaarnerani Nuup illoqarfiaat ineriartorneranut iluaqutissiisoqassasoq.

Pineqartumi ataatsimi pineqartoq alla sioqqullugu missingersuutinut konto imaarsimagaangat tapiinissamut neriorsuutit sanaartugassatullu pilersaarutit pisariaqanngikkaluartumik siusinnerusukkut kinguaattoortarsimapput.

Nalilerneqarportaaq ineqarneq pillugu siunnersuut pitsanngortitsissasoq, kiisalu Paamiuni Tasiilamilu aserfallassimagaluaqisunut iluaqutissiinermik nassataqarsinnaasoq

Aningaaserivinnik realkreditimillu sullisisunik isummersoqateqarneq tunngavigalugu kommunip naatsorsuutigaa aningaasalersuisinnaanermut periarfissaaruteratarsinnaaneq pilersinnaasoq pilersussallugu piareersimaffigisariaqartoq.

Taamatuttaaq naatsorsuutigineqarpoq, maanna niuernermi pigisat aalaakkaasut sananeqarneranni akiusut taarsigassarsisitsinermik aaqqissuussinerit nutaat atorlugit akigititat attatiinnarneqarsinnaassasut. Tamatumunnga atatillugu pigisanik aalaakkaasunik niueruteqartarnermi akunnermiliuttartoq Laarseeraq Chemnitz kommunimit innersuussutigineqarpoq, taannami Sermitsiami issuarneqarsimammatt, taasimavaalu pisortanit taarsigassarsisitsisarneq akiusup aalajangerneqartarneranut tunngaviusut arlallit ilagiinnaraat, allallu assersuutigalugu akileraarutitigut ernianik ilanngaateqartarneq, pigisap aalaakkaasup sumiiffia kiisalu niuernermi sunniutaasartut soorlu neqeroortarneq pisiumassuseqarnerlu il.il.

Naggataatigut kommunip sinnisaasa maluginiallaqquaat, ukiuni kingullerni tallimani Nuummi pisortanit taarsigassarsiissutit 2/3-lii atorneqarsimammata, taakkulu taarsigassarsiissutit pilerigineqarluinnarsimasut. Siunissami aningaasat agguattarnissaannut pileriginninneq tunngavigineqassanersoq imaluunniit naalakkersuinikkut pisariaqartitat allat tunngavigineqassanersut aarleqqutigineqarpoq.

Kommuneqarfik Sermersooq

Ull. 27. Oktober ataatsimiitaliaq Kommuneqarfik Sermersuumik naapeqateqaqqippoq. Tassani ilaatigut naapeqatigineqarput Borgmester Asii Chemnitz Narup, kommunaldirektør Lars Møller-Sørensen aamma illoqarfiaup pilersaarusiornarani pisortaq Bilo Høegh Stigsen kiisalu Nuuk City Development-imi aqutsinermi pisortaaneq Jens B. Frederiksen.

Ataatsimiinnermi tassani Nuummi ineriartornerup aqunnissaanut pilersaarut pingarnertut sammineqarpoq, isummersorfigineqarlunilu ingerlatsisut namminersortut taarsigassarsinikkut aningaasalersuisarnerat.

Erseqqissaatigineqarpoq nalinginnaasumik inissianut Nuummi maanna inissanik utaqqisut ukiuni 15-init 20-t tungaanut utaqqisariaqartartut, assersuutigalugulu Sisimiuni qaammatini

6-nniit 12-t tungaanut utaqqisoqartariaqartartoq. Tamatut kisiartaalluni tatineqarneq oqimaappoq, taamaattumillu siunissami ineriarnermut aaqqiissutissanik Naalakkersuisut suleqatigerusunneqartorujussuupput.

5. Inatsisissap nassuaatiginera

Ataatsimiitaliap siunnersummik suliaqarnerminut atatillugu inatsisissatut siunnersuut pillugu Ineqarnermut il.il. Naalakkersuisoq inatsisissatut siunnersuut pillugu nassuaateqarnissaanut qinnuigisimavaa.

Ull. 13. Oktober inatsisissaq pillugu nassuaaneq ingerlanneqarpoq, tassanilu ataatsimiitaliaq inissiaateqarnermut inatsiseqarneq pillugu annertunerusumik paasiaqarnissamut periarfissaqarsimavooq.

Inatsisit pillugit nassuaanermi partiit attaviitsorlu Sanaartornermut ataatsimiitaliamilaasortaangikkaluartut aamma peqataatinneqarput.

Uku immikkut erseqqissaatigineqarput:

- Taarsigassarsiaritassanut aningaasaliissutit kommuninut nuunneqassapput, taamaallunilu innuttaasut sumiiffimmiaataasiinnarmi qinnuteqartassapput taarsigassarsisassallutillu.
- Aningaasat nunami sumiinneq apeqqutaalluni, sumilu realkreditimit aningaaserivimmillu taarsigassarsisinhaaneq eqqarsaatigalugu annertussusilerneqartassapput. Taamaalluni illoqarfinni minnerni akissarsiakitsut akunnattunillu isertitaqartartut iluaquserneqassapput.
- Nuummi inissialornermut taarsigassarsitisarisarneq piffissap ingerlanerani ullumikkornit appasinnerulersinneqassaaq.
- Illut soraarnerussutisialinnit aamma siusinaarlutik soraarnerussutisialinnit pigineqartut iluarsannissaannut taarsigassarsitisarisarneq periarfissinneqassaaq.
- Piginnittut nikinneranni akiligassanik aalajangersimasunik atuutsitsisoqalissaaq – tamanna iluanaarniarnissamut pinaveersaataassaaq aammalu piginnittunngornissat aningaasalersorneqarnissaannut oqilisaataassalluni – pingaartumik inissiaq arlaleriarluni tunineqarsimappat.
- Taarsigassarsisut piffissaq sioqqullugu taarsigassarsiaminnik akiliinissamut periarfissinneqassapput, tassanilu taarsigassarsiat maanna naliusunut iluarsineqassapput.
- Suliat suliarineqartarneri pisariinnerusoq – saaffissaq ataasiinnaq

- Taarsigassarsiat amerlassusaannik assigiinngiartitsineq, taarsigassarsiat amerlassusaannut najukkanik ataasiakkaanik apeqqutaasitsiviusoq
- Soraarnerussutisialinnut inissianik pioreersunik iluarsaassassinissamut aningaasalersuutissaannut taarsigassarsiat amerlanerusut
- Piffissaq sioqqullugu taarsigassarsianut akiliinissaq pilerinarnerusoq

6. Siunnersuutip ataatsimiitaliamit suliarineqarnera

Ataatsimiitaliap siunnersuut misissorpaa, kiisalu Naalakkersuisoq akisussaasoq soqtigisaqartullu avataaneersut peqatigalugit tamanna pillugu isummersoqateqarluni.

Ataatsimiitaliaq ataatsimut isigalugu isumaqarpoq, taarsigassarseraatsip nutarterneqarnera tulluartuusooq. Tassungalu atatillugu pissutsit ataani taaneqartut ataatsimiitaliamit pingaaruteqartutut isagineqarput: :

- Nuummi inissianik niuernerup nalinginnaasunngortinnissaa
- Taarsigassarsiat sioqqutsilluni akilersinnaanerinut periarfissaq
- Piginnittut nikinneranni taarsigassarsiat tamarmiusut 15 %-iinik akilersuisinnaaneq
- Utoqqalinersialinnut pitsangorsaanermut, iluarsaassinermut alliliinissamullu taarsigassarsisinnaaneq
- Pisortanut akiitsut akiligassat pissutigalugit taarsigassarsiniarnermi itigartitsisinnaaneq
- Saaffigisassap ataasiinnaaneratigut qinnuteqartitsisarnerup pisariillinera

Siusinnerusukkut aningaasanik sinaakkusiussanik atuinermut sanilliullugu aningaasatigut ingerlatsinerup qanoq ittuunissaa ataatsimiitaliap aamma isummersorfigaa. Tassunga atatillugu ataatsimiitaliap maluginiarpa, piffissap ingerlanerani aningaasatigut neriorsuinerit allangorarsimaqisut. Aaqqissuussinermut 20/20/60-imut, piginneqatigiilluni inissialianut aamma nutarterinissamik taarsigassarsisitsinermut Nunatta Aningaasiviata aningaasaatai kr. 30 mio.-t missaaniittut ukiuni kingullerni tallimani ukiumut agguaqatigiissillugit atorneqarnikuupput.

Taamaallilluni siunissami ukiumut kr. 35 mio.-t atorniarneqartut naammattutut isagineqarput.

Taamaattorli aningaasat atorneqartarnerat assigiinngisitaartorujussuusooq paasineqarsimavoq, tamannalu kommunimiit kommunimut nikerartorujussuusimavoq.

Nuna tamakkerlugu pilersaarusiamut nassuaat 2017 maanna tusarniaassutaasoq tunngavigalugu titartagaq 1.6-imi paassisutissat tunngavigalugit piffissami 2014-imiit 2016-imut namminerisamik illuliortiternermut tapiissutinik neriorsuuteqarnermut tunngasut pillugit Sanaartornermut ataatsimiitaliap skema ataaniittooq suliarisimavaa:

Mio.kr./sumi	Avannaata	Qeqertalik	Qeqqata	Sermersooq	Kujalleq	Katillugit
815	4.166	29.312	61.201	2.630	98.125	

Tassani takuneqarsinnaavoq aningaasat qanoq agguataarneqarsimanersut, taamaallillutillu Qeqqata Kommuniani innuttaasut aningaasat 3/10-sa missaaniittunik akiitsoqalersimapput, Sermersuullu Kommuniani aningaasat 6/10-ii taarsigassarsiarineqarsimapput, nunallu sinneraniittut aningaasat 1/10-liisa missaaniittunik taarsigassarsisimapput.

Ataatsimiititaliap maluginiarpa, aningaasat ataatsimoortumik tapiissutituulli agguanneqassagaluarpata, taava Kommuneqarfik Sermersooq aningaasaliunneqartut kr. 35 mio.-t 1/3-nik pissarsissaq, taamaallunilu ukiumut kr. 12 mio.-t missaaniittunik pissarsissalluni. Kommunini katitertarissanik, illunut ataatsimoorussanut, sanaartoqatigiillunilu illulianik sanaartornermi aqutsinermut sulianillu ingerlatsinermut tunniussinermi naatsorsueriaaseq atorneqartillugu Kommuneqarfik Sermersuup kisimiilluni ataatsimut aningaasaliissutit 1/5-nik tigusaqassaaq. Maannamut agguaasseriaatsimut sanilliullugu kisitsisit taakku naapertuutinngeqaat, aammattaaq innuttaaqatitta inissaqartinniarneqarnerisa pisariaqarnera eqqarsaatigissagaanni.

Kiisalu ataatsimiititaliap maluginiarpa, nunaqarfinni isorliunerusunilu inissialiortitsinermut aningaasat kommuninit tiguneqareersimammata, naak aningaasanik inatsimmik isumaqatigiinniarnerup saniatigut naalakkersuinikkut isummersortoqarsimanngikkaluartoq. Aningaasanilli nuussinermut atatillugu ingerlaannaq atuarneqarsinnaanngilaq sinerissami illunut qassinut aningaasaliisoqarsimanersoq. Tassunga atatillugu ataatsimiititaliaq A/S INI-mit paasitinneqarsimavoq, kommunit arlaannaalluunniit aaqqissusseqqinnerup atuutilerneranut atatillugu 2017-imut taakku kr. 25 mio.-t missaaniittut pillugit aqutsinermut piviusunngortitsinermullu tunngasunik saaffiginnissimanngitsut. Tamanna pisimanngilaq, naak Kommunini katitertarissanik, illunut ataatsimoorussanut, sanaartoqatigiillunilu illulianik sanaartornermi aqutsinermut sulianillu ingerlatsinermut ilitsersuutinik A/S INI-p toqqaannartumik attaviginissaa Naalakkersuisunit kaammattuutaasimagaluartoq, taannalu 13. December 2016 ullulerneqarsimavoq.

Taarsigassarsinissamut periarfissat nutaat tunngavigalugit pisortanit taarsigassarsisitsinermi procentiliussaq apparneqarpoq 30 %-inngortillugu. Pisortanit taarsigassarsianut aningaasatigut killiliussaasut kr. 0,588 mio.-niit kr. 0,88 mio.-t annertunerpaaffiliullugit qaffanneqarput. Kisitsisit taakku nutaat ataatsimiititaliamit soqtiginartinneqarput, taarsigassarsinermilu periarfissat assiginngitsuunerit tulluartuusorineqarlutik. Tamannali kommunini aningaasivinni ataasiakkaani aningaasat pilertortumik nungunneqartalernissaannik aamma kinguneqarsinnaavoq.

Taarsigassarsisitsinermi killiliussat nutaat kingunerissavaat taarsigassarsisitsinernik aarleqquteqarfiusinnaasunik kommunit annertunerusumik nalaataqarsinnaanerat.

Taamaalilluni Sanaartornermut ataatsimiititaliap kommunit mianersoqqussavai oqaatigilluaannarlugu killissarititaq sinnerlugu ingerlatsinnginnissaannut.

Tamanna tunngavigalugu inissianik sanaartornermut akisussaanerup annertunerusumik siaruaternissaa Sanaartornermut ataatsimiititaliap aarlerinartoqartippaa, peqatigitilluguli maluginiarlugu kommunit taamatut aarleqquteqarneq kommunimi innuttaasut sinnerlugit isumaqatiginngikkaat.

Isumaliutissiissutip uuma suliarineqarnissaanut Ineqarnermut il.il. Naalakkersuisoqarfimmik pitsaasumik isummersoqateqarsimaneq ataatsimiititaliap maluginiarlugulu pitsaasutut isigaa. Taamaalillunilu ataatsimiititaliap isumaanik naapertuerusussuseqarneq tusarnaarusussuseqarnerlu ataatsimiititaliap naammaginartilluinnarpaa..

7. Siunnersuutip aningaasatigut kingunissai

Siunnersuutip piviusunngornarani aningaasatigut kingunissai siunnersuutip nalinginnaasumik nassuiaatitaani allaaserineqarput. Tassani allassimavoq siunnersummi Namminersorlutik Oqartussanut ingerlaannaq sipaaruteqartitsinissaq siunertarineqanngitsoq.

Namminersorlutik Oqartussat aamma kommunit

” Manna tikillugu 20/20/60-imik aaqqissuussinermi inissianik nutaanik sanaartornermut Namminersorlutik Oqartussat taarsigassarsisitsinerannut manna tikillugu aningaasat immikkoortinnejartartut pissusissamisoortumik 2018-imut Aningaasanut inatsimmi ingerlateqqinneqassanngillat.

Kommuninut suliassamik nuussinermut atatillugu, kommuninut ataatsimoortumik tapiissutit qaffanneqassapput. Kommunit taamaalillutik nutaanik inissialiornerup aningaasalersorneqarnissaanut taarsigassarsitsinermut atatillugu allaffissornermut aningaasalersuinermullu akisussaaffik tigussavaat.

Siunnersuutip kingunerisaanik inissianik nutaanik sanaartornermut aningaasalersuinermut taarsigassarsiat annertussusaat nunami assigiinngissitaassapput. Kommuneqarfik Sermersooq eqqarsaatigalugu Nuummi inissianik nutaanik sanaartornermut aningaasalersuinissamut taarsigassarsianut aningaasartuutini sipaaruteqarneq pissutsit allanngunngippata ukiuni arlalinni piviusunngortinnejassapput. Paarlattuanillu Tasiilami, Paamiuni, Ittoqqortoormiuni aamma nunaqarfintti aningaasartuutit qaffannissaat piviusunngortinnejassalluni.

Kommunit ataatsimut eqqarsaatigalugit siunnersuut aningaasaqarnikkut sunniuteqassanngilaq. Inissianik nutaanik sanaartornermut aningaasalersuinissamut taarsigassarsinissamut aningaasat kommunit missingersuutaanni kommunit immikkoortitsissapput. Taamaaqataanik

kommunit kisimiillutik siunissami inissialiornermut aningaasalersuinissamut pisortat taarsigassarsiarititassaannik pingaarnersiuineq isumagisarilissavaat.

Kommunit manna tikillugu soorlu taamaassimasoq inissiat nutaanik sanaartornerinut aningaasalersuinissamut taarsigassarsiassat pillugit qinnuteqaatinik sulianik suliarinninneq isumagissuaat.

Inissianik nutaanik sanaartornermut aningaasalersuinissamut taarsigassarsiat pillugit sulianik nutaanik Namminersorlutik Oqartussat suliaqassanngillat. Piffissap ingerlanerani taarsigassarsianik ingerlasunik aqtsineq atorunnaarsitsineq isumannaarinerillu naapertorlugit annikilliartussaaq.

Taarsigassarsiarititat atuutereersut maannamut naliusumut sioqqutsisumik akiliisinnaanermut periarfissaqarneq pillugu siunnersuummi § 37, missingersuusiarineqartunit siusinnerusukkut iluanaaruteqartitsilluni pisortat karsiinut iluaqsiisinnaassaaq. Pisortanit taarsigassarsiarititat maannakkut naliusunut sioqqutsisumik akilerneqarnissaannut siusinnerusukkut ammaassisoqarsimannngilaq. Tunngavagineqartut tunngavigalugit taarsigassarsisut qassit periarfissamik atuissanersut, missingersorneqarsinnaanngilaq.”

Inuussutissarsiortunut aningaasatigut kingunissai

“Pingaarnertigut isigalugu siunnersuut inuussutissarsiortunut aningaasaqarnikkut imaluunniit allaffissornikkut kinguneqartitsinissa naatsorsuutigineqanngilaq.

Inissianik nutaanik sanaartornermut aningaasalersuinermut taarsigassarsiat killiinik allannguinerup siunertaraa illoqarfinni nunaqarfinnilu arlalinni inissianik nutaanik sanaartornermut sinaakkusiussat pitsaanerulersinnissaat peqatigisaanillu Nuummi inissianik sanaartornermik aningaasalersuineq nalinginnaasunngortillugu.

Aningaasalersuisarnerup allanngortinnera piffissami ikaarsaarfiusumi Nuummi sanaartornermik ingerlataqarnermut sunniuteqarsinnaassaaq. Taamaattorli Grønlandsbanken A/S aamma BankNordik naliliippu pisortat taarsigassarsarnerisa annikilliartortinnerini atorunnaarsikkiartuaartinnerinilu Nuummi inissianik nutaanik sanaartornermut realkredit-imit aningaasalersuinissaq suli anguneqarsinnaassasoq. Grønlandsbanken A/S aamma BankNordik naliliisimapput taarsigassarsitsinermut atugassarititaasuni siunnersuutigineqartuni taakkunani Nuummi inissianik nutaanik suli sanaartornissamut tunngavissaqarumaartoq.

Siunnersuutip kingunerisaanik kommunalbestyrelsini ataasiakkaani inissianik nutaanik sanaartornermut taarsigassarsisitsineq pillugu qinnuteqaatinik taamaallaat tunniussisoqarsinnaassaaq. Taamaaqataanik taarsigassarsiat tunniunneqarnissaat pillugu

noqqaaneq taamaallaat kommunalbestyrelsimit nassiunneqartussaassaaq. Inuussutissarsiortut – sanaartortut namminersortut – eqqarsaatigalugit tamanna allaffisornermik annikitsumik oqilisaanermik kinguneqarsinnaavoq.”

Eqikkaaneq

Siunnersuutip nalinginnaasumik nassuaatitaani taaneqarsimavoq siunnersuutip akuerineqarnerani tamanna Nunatta Aningaasivianut aningaasatigut sunniuteqarnavianianganngitsoq, siunnersuullu taamaalilluni missingersuutinut sunniuteqassanngitsoq. Tamanna tunngavigalugu ataatsimiititaliaq allatut naliliinissamut tunngavissaqanngilaq. Taamaalilluni ataatsimiititaliap tatifaa apeqqut Naalakkersuisunit sukumiisumik misissorneqarsimasoq, kiisalu aningaasatigut sunniutaasussat allat pilersinnaanngitsut. Naatsorsuutigisalli akerlianik siunnersuut pisortat aningaasiviinut aningaasartuutinik amerlanerusunik nassataqassagaluarpat, aningaasartuutit taakku aningaasaliissutaareersunit matussuserneqartariaqassapput, taamaattoqassappallu suliniutit allat annikilliliiffigineqarnerinik kinguneqartariaqassaaq

8. Ataatsimiititaliap inassutai

Ataatsimiititaliaq isumaqatigiuttoq siunnersuut pillugu ima oqaaseqaateqassaaq:

- Ataatsimiititaliap naatsorsuutigaa kommunini illuliortiternut aamma piginneqatigiilluni inissianut aningaasanik piviusunngortitsineq konto pingaerneq 20.05.20-mut Kommunimut ataatsimoortumik tapiissutinut ilangunneqarumaasasoq, aamma
- Aningaasat nuunneqartut “parnaarunneqassasut”, taamaalillutik aningaasat taamaallaat ineqarnermut siunertanut atorneqarsinnaalersillugit, ukununnga: taarsigassarsisitsinermut, sanaartornermut aamma nutarterinermut, aamma
- Kommunini katitertarissanik, illunut ataatsimoorussanik, sanaartoqatigiillunilu illulianik aqutsinermut sulianillu ingerlatsinermut inoqarfiusunut ikinnerusunik innuttalinnut iluaqtissiisussamik aningaasanut agguassinissamut tunngavissiamik peqartoqareerpoq, aamma
- Agguassinissamut tunngavissiamik nutaamik suliaqartoqarnissaa, tassuunakkullu isumannaarneqassaaq aningaasanik siunissami agguasserriaaseq pissutigalugu illoqarfuit ineriartorfiusut unitsinneqannginnissaat.

Ataatsimiititaliap isumaqatigiittup tamanna tunngavigalugu siunnersuut saqqummiunneqartoq akuerineqassasoq inassutigaa.

Taamatut oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

Bendt B. Kristiansen,
Siulittaasoq

Jens-Erik Kirkegaard,
Siulittaasup tullia

Pitsi Høegh

Jess Svane

Villy Olsvig